

**Nunatsinni allaffissornerup nunatsinnut tulluartumik nutaamik
aaqqissuuteqqinnissaanut Naalakkersuisut periusissiamik suliaqaqqullugit
peqquneqarnissaanik Inatsisartut aalajangiiffigisassaattut siunnersuut. Periusissiaq
kingusinnerpaamik UPA2024-mi saqqummiunneqassaaq.
Inatsisartunut ilaasortamit Inatsisartut, Doris J. Jensenimit, Siumut, saqqummiunneqartoq**

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliariinninnermini ilaasortarai:

Inatsisartunut ilaasortaq Hans Peter Poulsen, Siumut, siulittaasoq
Inatsisartunut ilaasortaq Jens Frederik Nielsen, Demokraatit, siulittaasup tullia
Inatsisartunut ilaasortaq Asii Chemnitz Narup, Inuit Ataqatigiit
Inatsisartunut ilaasortaq Mariia Simonsen, Inuit Ataqatigiit
Inatsisartunut ilaasortaq Kuno Fencker, Siumut
Inatsisartunut ilaasortaq Lars Poulsen, Siumut
Inatsisartunut ilaasortaq Jens Napaattooq, Naleraq

UPA 2023-mi ulloq 9. maj 2023 siullermeerinninnerup kingorna ataatsimiititaliap sunnersuut misissorpaa.

1. Siunnersuutip imarisaa siunertaalu

Nunatsinni allaffissornerup nunatsinnut tulluartumik nutaamik aaqqissuuteqqinnissaanut Naalakkersuisut periusissiamik suliaqaqqullugit peqquneqarnissaat aalajangiiffigisassatut siunnersuutikkut matumuunakkut siunertarineqarpoq. Oqaluttuarisaanermiit isigalugu nunatsinni allaffissornerup danskit allaffissornerannut assingusunngorluni ineriartorsimanera siunnersuuteqarnermut tunngavilersuutigineqarpoq. Allaffissornerup qanoq aaqqissuuteqqinnejarsinnaaneranut, taamaalillunilu nunatsinnut tulluartunngortinnissaanut, periusissiornissaq siunnersuuteqartup siunnersuuteqarnermini pingaarnertut anguniarpaa. Danskit oqaasiinik atuinerunerup, allaffissornerujussuup innuttaasunillu qanumut sullissinerup pisariaqartinnejqaraluarluni asinngariartornerata nunatsinni pissutsinut naapertuutinnginnerat siunnersuuteqarnermut ilaatigut tunngavilersuutigineqarput.

2. Siunnersuutip Inatsisartunit siullermeerneqarnera

Siunnersuuteqarnermi anguniarneqartoq siullermeerinninnermi nalinginnaasumik taperserneqarpoq. Allaffisornerup nunatsinni pissutsinut tulluarsarnerunissa pisariaqartinneqartoq kiisalu allaffisornerup annikillisartariaqarnera partiinit tamanit isumaqatigiissutigineqarpoq. Kiisalu qulequttat tikinnejartut ilagaat kommunit Namminersorlutilu Oqartussat akornanni akisussaaffit agguataarneqarneranni marloqiusamik allaffissortoqarsinnaanera. Aammalu allaffisornerup kalaallisuujunissaata kissaatigineqarnera oqaatigineqarpoq.

Siullermeerinninnermi allannguutissatut siunnersuutinik marlunnik saqqummiussisoqarpoq:

Naalakkersuisut allannguutissatut siunnersuut imattoq saqqummiuppaat:

"Kalaallit Nunaannut naleqquatumik allaffissornikkut aaqqissuussinissamik suliaqarneq Inatsisiliornerni nutaani aammalu aaqqissusseqqinnerni tamani Naalakkersuisut suliaqartarnissaannik peqquneqarnissaannik Inatsisartut aalajangiiffigisassaattut siunnersuut."

Siumup allannguutissatut siunnersuut imattoq saqqummiuppat:

"Nunatsinni allaffisornerup nunatsinnut tulluartumik nutaamik aaqqissuuteqqinnissaanut Naalakkersuisut suliaqaqqullugit peqquneqarnissaanik Inatsisartut aalajangiiffigisassaattut siunnersuut."

3. Ataatsimiitaliap siunnersummik suliariinninnera

Allaffisornerup nunatsinni pissutsinut qanoq naleqqussarneqarsinnaaneranik oqallinnermi allaffisornerup annertussusia oqaatsillu atorneqartut qitiutinneqartut ataatsimiitaliamit maluginiarneqarpoq.

Allaffisornerup annikillineqarnissaa partiinit tamanit kissaatigineqartoq ataatsimiitaliamit maluginiarneqarpoq, tamatumanilu pisariaqassaaq allaffissornikkut suliassat ikinnerunissaat. Taamaalillunilu suliassat allaffissornikkut isumagineqartussatut naatsorsuutigineqartut amerlassusiat allaffisornerullu annertussusia ataqtigiittariaqarput. Kiisalu allaffisornerup annikinnerunissaanik kissaateqarneq Naalakkersuisunit taperserneqartoq, tamatumunngalu atatillugu Naalakkersuisut akissuteqaataanni allassimasutut iliuutsit arlallit aallartinneqareersut soorlu akileraartarnikkut iluarsaaqqinneq, utoqqarnut tunngasuni iluarsaaqqinneq, isumaginninnermut tunngasuni inatsisiliorneq kiisalu suliffeqarnermik suliassaqarfimmi nutarterinerit innersuussutigineqartut ataatsimiitaliamit maluginiarneqarpoq.

Kalaallit oqaasiisa pissutsini pisortanut tunngassutilinni annertunerusumik atugaanissaat partiit akornanni oqaatigineqartoq oqaatsit pillugit apeqqummut tunngatillugu ataatsimiitaliamit maluginiarneqarpoq. Tamatumunnga ilaatigut tunngavilersuutigineqarpoq oqaatsit ataasiinnaat atorlugit allaffisornermi nutserinermut oqaluttaanermullu sulisut aningaasallu ikinnerusut atorneqartussaanerat. Kalaallit oqaasiisa allaffisornermi kisimik atorneqarnissaasa sulissutiginissaanguniagaalluartutut ataatsimiitaliamit isigineqarpoq, tamatumanili

pisariaqarpoq piffissami sivisunerusumi naleqqussaasoqarnissaa. Tassunga atatillugu ilinniartitaanikkut suliniuteqarnissaq aammalu sulisut piginnaasaannik qaffassaanissaq pingaaruteqarmat ataatsimiititaliamit erseqqissarneqassaaq.

Iliuuseqarnissamut piumassuseqarneq siunnersuutip matuma oqallisigineqarnerani malunnarpoq, tamannalumi allannguutissatut siunnersuutit saqqummiunneqarnerisigut takussutissinneqarpoq. Allaffisornerup aaqqissuuteqqinnejarnissaanut periusissiorissaq siunnersuuteqartup kissaatigigaa, allannguutissatulli siunnersuutini periusissiamik suliaqarnissaq qitiutinnejarnani aaqqissusseqqinnissap aallartinnejarnissaq pineqarnerusoq ataatsimiititaliamit maluginiarneqarpoq. Tassunga atatillugu allaffisornerup aaqqissuussaanera annertussusialu siunnersummi matuman i pineqartut uteqqiatumik sammineqarmata, allaffisornerup nutarternerata aaqqissuuteqqinnejarneralu qanoq piviusunngortinneranit pillugu kaammattuutit tigussaasut pisariaqartinneqarmata ataatsimiititaliamit oqaatigineqassaaq. Tassunga nangissutit ataatsimiititaliamit taarusunneqarpoq allaffisornerup annertussusianik annikillisitsinissamut periarfissat misissornissaannut Naalakkersuisut 2023-mi aningaasanut inatsimmut tunngatillugu isumaqatigiissutikkut peqquneqareermata.

4. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut. Tamanna naapertorlugu siunnersuutip piviusunngortinnerani aningaasatigut kingunerisassat siunnersummi nalunaarneqartut, taamaalillunilu periusissiorneq pisortani A/C fuldmægtigip ukumi iluitsumi sulineranik naleqartussatut naatsorsuutigineqartoq, ataatsimiititaliamit maluginiarneqarpoq.

5. Ataatsimiititaliap oqaaseqaatai inassuteqaataalu

Allaffisornerup Kalaallit Nunaannut naleqqussakkamik qanoq nutarterneqarlunilu aaqqissuuteqqinnejarnissaanut tigussaasunik kaammattuuteqarnissaq pisariaqartinneqartoq aalajangiiffigisassatut siunnersummut tunngatillugu **ataatsimiititaliamit isumaqatigiittumit oqaatigineqassaaq**. Tassunga atatillugu kaammattuutinik tigussaasunik imaqtumik iliusissatut pilersaarummik, attassinissamik siuariartornissamullu pilersaarummut 2-mut aallartinneqareerumut ilanngunneqarsinnaasumik, suliaqarnissamik Naalakkersuisut ataatsimiititaliamit kaammattorneqarput. Matuman i pineqarpoq aaqqissusseqqinnej 3: Pisortat suliassaqarfianik siunissamut isumannaarineq, tassani allassimalluni pisortat suliassaqarfii innutasut amerlassusaannut nunattalu aningaasaqarneranut naleqqussarneqassasut.

Tamatuma saniatigut allaffissornikkut kalaallit oqaasiinik atuinerup nukitorsarneqarnissaanut iliusissanik tigussaasunik iliusissatut pilersaarummi saqqummiusseqqullugit Naalakkersuisut kaammattorneqarput.

Allassimasutut oqaaseqaateqarluni ataatsimiititaliap **isumaqatigiittup** inassutigaa
Naalakkersuisut taamatullu Siumup allannguutissatut siunnersuutaat itigartinneqassasut
aalajangiiffigisassatullu siunnersuut akuerineqassasoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Hans Peter Poulsen
Siulittaasoq

Jens Frederik Nielsen
Siulittaasup tullia

Asii Chemnitz Narup

Mariia Simonsen

Kuno Fencker

Lars Poulsen

Jens Napaattooq